

Բուլղարիայի Հանրապետության Ստարա Չագորա մարզի պատվիրակության այցը ՀՀ Արագածոտնի մարզ

13.11.2019

ՀՀ Արագածոտնի մարզպետ Դավիթ Գևորգյանն այսօր ընդունել է Բուլղարիայի Հանրապետության Ստարա Չագորա մարզի պատվիրակությանը, որի կազմում էին Ստարա Չագորայի Նահանգապետ Գերգանա Միկովան և Նահանգապետի տեղակալ Դիմիտր Դրաչեվը: Ողջունելով պատվիրակության անդամներին՝ մարզպետ Դավիթ Գևորգյանը կարևորել է ՀՀ Արագածոտնի և ԲՀ Ստարա Չագորայի մարզերի միջև համագործակցության մեկնարկը: **-Մեր ժողովուրդները բազմաթիվ ընդհանրություններ ունեն, և տարբեր ժամանակաշրջաններում մեր պատմության ճանապարհները հատվել են: Վստահ եմ, որ առևտրատնտեսական, գյուղատնտեսության, զբոսաշրջության, կրթության, մշակույթի և այլ ոլորտներում համագործակցության եզրեր կգտնենք,-ասել է մարզպետը:** Ստարա Չագորայի Նահանգապետ Գերգանա Միկովան ևս կարևորել է այս հանդիպումը և նշել է, որ ուրախ է Արագածոտնի մարզում գտնվելու համար: **-Ստարա Չագորայում շատ հայեր են ապրում: Կարծում եմ դա ևս մեկ պատճառ է համագործակցության համար,-** ասել է Նահանգապետ Միկովան և հույս հայտնել, որ տարբեր ոլորտներում գործակցությունը կհաջողվի և սա կլինի իր առաջին, բայց ոչ վերջին այցը Արագածոտնի մարզ: Կողմերը քննարկել են կրթության, մշակույթի, առողջապահության ոլորտներին, գինու և կոնյակի արտադրությանը վերաբերող հարցեր: Հանդիպման ընթացքում կարևորվել է ներդրումային միջավայրի ձևավորումը, ինչը թույլ կտա զարգացնել զբոսաշրջության տարբեր ճյուղերը՝ հատկապես ձմեռային տուրիզմը Հայաստանում, իսկ ամառայինը՝ Բուլղարիայում: Քննարկվել են նաև պետական կառավարման համակարգի ընդհանրությունները, երկու մարզերում առկա միատեսակ կառույցների գործունեության, կառավարման ձևի և երկկողմ հետաքրքրություն ներկայացնող մի շարք այլ հարցեր: Ստարա Չագորայի մարզի պատվիրակության՝ Արագածոտնի մարզ կատարած եռօրյա այցի շրջանակներում նախատեսվում է ստորագրել հուշագիր, որով հիմք կդրվի արդյունավետ համագործակցության և գործնականում կամրապնդի կողմերի հարաբերությունները: Հուշագրում ամրագրված դրույթները կներկայացնենք հետագա հրապարակումներում: Հայաստանում Բուլղարիայի Հանրապետության դեսպանատան փոխանցմամբ՝ առաջին անգամ է, որ Բուլղարիայի Նահանգապետ է այցելել Հայաստան: Պաշտոնական ընդունելությունից հետո մարզպետ Դավիթ Գևորգյանը Ստարա Չագորայի պատվիրակության հետ շրջայց է կատարել Արագածոտնի մարզում: